

漫  
塘  
文  
集

禮

記

卷

之

一

上

卷

之

二

下

卷

之

漫塘文集卷二十六

朱金壇劉宰著

祭文

皇考雲茅先生成服祭文

某罪逆深重不自殞滅天篤降喪奪我皇考重念劬勞  
鞠育之恩莫知紀極號天叩地躄踊煩冤荼毒難堪靡  
所追及追惟皇考生平力學貫通今古乃不能登一第  
居一官以行其志盛德善行無媿古人雖享百年之壽  
未足以稱今乃止於七十有二矧某承乏近邑惟迎侍  
是便惟甘旨是圖方整葺園池以遲安車之來庶以遨  
以嬉不重去鄉之感選徒來迓近在朝夕何圖迓者未

行而報者已至曰有寒疾日就危困某棄官亟歸醫藥  
百端竟至不起嗚呼哀哉嗚呼痛哉父爲子天無父何  
怙父不可見子生奚益重於大事至重未敢卽死今也  
衣棺旣具衰麻就列敬陳薄奠以爲孝誠至哀無文言  
不盡意魂兮如在尙其鑒此

皇考雲茅先生大葬祭文

嗚呼哀哉富人所欲而居士則以仁易富寧人皆屬饜  
而已受其饑貴人所趨而居士則捨貴卽賤雖願盼之  
頃足生光輝而如弗聞知合偶而居亦人之常而居士  
寧獨居於盛壯之年弗忍呱呱之子或失其依豈居士  
之心固異於人而人則弗思嗚呼哀哉子之事親貴於

無違居士和以制行而某則踽踽涼涼與世背馳居士  
急於濟人而某則恬於所取使四顧旁皇而無其資居  
士矐念門戶欲少振起而某則蹒跚不前甘斂翼以低  
飛然則不孝之罪孰大於某矣況如某之慵懦某之流  
離者乎嗚呼哀哉一命以上皆足行志而白衣蓋棺尺  
寸莫推百金之聚足以自逸而且質且貸箱篋無遺嘉  
花美木高臺深池足以自怡而一屨之陋風雨不支適  
有安車容與舒遲老者之宜而應門一童弗輟自隨竹  
杖芒鞋朝東夕西含飴弄孫老者之爲而惟忠惟孝品  
凡識卑阿可阿琦一盲一癡徒企慕他人之有孫而太  
息歔歔然則悠悠斯世又孰如居士之賦子數奇者嗚

呼哀哉四寸之棺周身之衣生時所製又附益之辭村  
之原方山之岐生時所樂兆見於龜旣崇其堂而周其  
圍良月幾望寒氣未勝而春和薄施外姻畢來賓從祁  
祁相與訓誨諸孤而左右扶持使粗由於典禮而弗蹈  
於非彝然則英魂不昧其亦少慰於慈懷乎某等諸孤  
謹奉靈輻期以來辰登舟水湄川流甚平前途孔夷嗚  
呼哀哉向焉斯庭綵衣兒嬉今焉斯庭衰麻素幃向焉  
有行逆數歸期于今行矣而歸何時溫清孰問安否誰  
咨拊棺號慟淚血淋漓嗚呼哀哉

皇考雲茅先生大祥祭文

日月不居奄及大祥夙興夜處哀慕不寧敢用少牢之

奠祇薦祥事嗚呼哀哉堂之東偏實我先考平日燕處之地神之所安寧閒生死敬葺而新之以崇廟貌以土木之工未竟姑從舊廟耐于先祖俟禫祭之日併先祖遷焉嗚呼吾親之亡雖已再期而朝夕之奠猶庶幾平日菽水之養今几筵徹矣滫瀡之薦有時而菽水之養不及矣嗚呼哀哉嗚呼痛哉

祭伯母太孺人洪氏文

某等幼穉卽失母儀是訓是育伯母焉依長與諸兄各奉其親歲時往來喜色忻忻彼有嘉穀此有旨酒綵衣獻酬閒言無有天禍我宗降此鞠凶吾父之葬馬鬣新封哀號之聲兩家相聞寧復前時笑語追奔興言及此

五內崩分雖然人希七十已八十二人有病苦已倏而  
逝人寡嗣續已有孫子生也如斯可無憾已唯此孤生  
觸景愴懷重罹此憂感念無涯一觴之奠寄此深哀

伯母大葬祭文

嗚呼夫人母儀之肅婦道之備凜乎持已霜空秋霽温  
乎馭下惠風和氣享年八袞弄孫再世蘭芬屢播龍光  
狎被諸疾不侵一笑長逝展也夫人生死無媿某等不  
天幼失所恃母慈之仰夫人而已靈車將駕痛均爲子  
一觴之奠庶其鑒此

姊氏遷葬祭文

嗚呼哀哉女嫁從夫生死一致耐于皇姑亦古之義捨



舊從新議難中異鬱鬱佳城孔安且利魂兮卽此無恐  
無悸某等涕泗臨穴無閒初逝觴酒豆肉致茲誠意魂  
兮有知無我遐棄嗚呼哀哉

祭成忠兄文

人誰無生惟兄之生生而迍邐人誰無死惟兄之死死  
而可憐方在孩提慈母鍾愛少有疾痛積憂心疴不叱  
不呵惟教惟誨比失慈母歲十二周侍親爲學拾載西  
州歸來鄉關綽有休譽援筆成詩時有佳句喧傳眾口  
謂繼其父再游場屋意氣軒軒命也奈何五窮萃焉或  
寔其後或跋其前慮不及長身墮噲伍姻親分絕鄉閭  
路阻寒衣饑食誰拊誰顧得回窮閭固不暇擇二子長

矣教則某責兄其幸矣庶蓋前愆如何昏頑不悛餘子  
尙幼但索梨栗仲子差強從師旅食悠悠目前有懷曷  
釋嗚呼哀哉方邊事之聿興而戍役之屢遣某度勝負  
之難常懼吾兄之不免故躬修轅門之謁載馳幕府之  
書庶脫戎籍得安里居又慮俸廩旣絕甌石無儲適某  
奉命恪之官次得以田園悉分兄弟旣而已脫伍符已  
分地利意卽反於雲茅遂優游而卒歲何意得免於兵  
而不免於病曾歔歔之未歷而死期之已至乎嗚呼痛  
哉某宦學遠方家有弱弟所望兄歸緩急有恃吾兄去  
我而死吾弟懵然於事利何爲而知就害何爲而知避  
乎嗚呼天平殞殮事之至難疫癘眾之所避事難而妻

子不知謹眾避而閭里不之視則夫喪具必有不精周  
身必有不備者矣嗚呼吾兄之亡某家之主當教而子  
且嫁而女子之淑慝當異厥處庶幾維持不替厥緒官  
事有攝秋風旣清某當親歸祔兄先塋一觴之奠尙鑒  
茲誠

### 葬兄祭文

具家饌致祭泣涕而言曰某等嘗爲兄卜居僻村事弗  
克遂乃今卜葬惟僻村爲宜豈疇昔之言固其兆耶先  
君之塋相距百步祖父祖母之塋亦僅五里山勢蜿蜒  
泉流清泚惟兄安之有闕文不肖勢不能及自餘幼者須  
拊長者須教使門戶粗立不墜兄末年之志某等敢不

身任嫂姪咸在斯言不欺兄其鑒之卮酒豆肉敬陳祖  
奠

祭司法兄恭靖先生文

嗚呼業患不精兄學之成雪案螢窗歲幾周星筆削之  
嚴炳然聖經名患不聞兄早有聲五登賢書冠于月評  
射策甲科直言駭聽吾祖吾父壽七十二念昔先人皆  
莫之比兄之得年抑又過此繼世象賢足強人意兄之  
二子金昆玉季子又生孫蘭堦濟濟加之薄有田園可  
耕可桑伏臘烝嘗有苾其香旣基旣堂貫以脩廊宜室  
宜家小大平康嗚呼吾兄夫何憾焉得喪乖逢何者非  
天始勤終逸人世幾何如兄生平所得已多死生離合

人情所重蓋棺事已寧不爲慟一觴之奠闔族同之技  
淚陳辭兄其聽之嗚呼哀哉尙饗

恭靖兄大葬祭文

嗚呼大厦之材雪霜幾經大冶之金百鍊乃精人生多  
艱孰如吾兄早歲而孤屋敝且傾家徒四壁瓶無斗升  
日晏徒師朝餐未營十月絺綌曉風泠泠甫冠而游入  
學金陵空囊羞澁隻影伶俚雪凜殘更猶依短檠月書  
季攷稍稍呈能有友招徠並案分燈榻每夜懸門常晝  
扃學成而歸漸著月評五登賢書再冠羣英識者謂宜  
拾芥紫青餘子碌碌拔茅彙征而此遲回鬢髮星星晚  
承清問奏策明廷慷慨直言朝陽鳳鳴擢居第一竟阻

垂成小試警曹值歲不登幸部使者惻怛哀矜檄參郡  
椽以推饑惇朝驅夕馳殆徧郊垆致使流離迄臻枚寧  
薦員溢格銓曹有程蕞爾澄江持三尺平遲次連年寂  
寞柴荆瓜時而往穀旦揚舫值彼淫酗忌此獨醒翩然  
歸舟滿載月明叢祠賦祿袖手家庭譬彼老驥瘦骨峰  
稜萬里長塗猶足騫騰使得一縣薄賦輕刑拊字心勞  
寧媿陽城使臨一州惠養黎蒸愁恨歎息其誰汝令使  
當一路激濁揚清貪夫解印膽失魂驚使立清朝正笏  
影纓必扶正論盡破淫朋命也奈何朝露先零萬不一  
施賚志冥冥矧惟嫂氏懿德有稱佐兄立家井井繩繩  
云何不淑死喪相仍嗚呼哀哉某幼荷提攜長獲齊名

中年得疾灰心槁形所望吾兄克振家聲而止於斯哀  
何可勝楊西之原祖考連塋卜其宅兆雅志是承輜車  
將載一奠陳情諸孫眾多季子熒熒門戶之貴展也非  
輕某雖不肖倘假餘齡左扶右持敢不竭誠斯言或欺  
兄猶有靈嗚呼哀哉伏惟尙饗

代姪祭父成服文

嗚呼人誰不死痛哉吾父方在髫鬣遽失所怙晝鈔夜  
誦不閒寒暑學成行修袞袞入官獨此一第登天之難  
大庭對策收功歲寒白首宦塗淒涼一尉廉勤自將抑  
足行志薦剝紛來夷塗可企澄江去家波平如席及瓜  
而往持平三尺適際彼狂爲二千石眾醉獨醒展也不

卷二十六  
容浩然而歸坦若胷中曰予何尤道固不同賦祿叢祠  
俛仰五載人哀其窮謂此奚罪曰予何憂有真樂在不  
得於人天則矜之宜備五福至於期頤胡爲天道復不  
可窺不良于行日以衰悴勺飲不留留輒中痞七十者  
稀僅踰三歲嗚呼哀哉人誰不死亦可痛矣大殮已成  
衰麻已具某等上奉母親下率子婦捧觴稱壽猶記平  
時叩地呼天知乎不知

代姪祭父母大葬文

嗚呼哀哉天地至肅之氣至必以漸故萬物遇之雖困  
苦憔悴若無以生而猶足以支若某之家禍蓋積陰沍  
寒冰霜風雪一朝驟至而不可支者吾父吾母尙忍聞



之某尙忍言之哉方吾父母之無恙也某出則有怙入  
則有恃而左右提攜之者有兄焉某雖知安樂之難常  
親年之可喜可懼亦意仁者壽而吾親安於仁善者福  
而吾親篤於善天固未遽奪之年藉年有脩短禍變之  
來亦不若是其亟且併也故所習者綵衣嬉戲而不知  
衰經之爲戚也所事者溫清定省而不知主持門戶之  
爲不易也嗚呼孰謂禍變之亟且併有如是者乎以吾  
父吾母吾兄之賢曾不半歲而偕逝乎繼自今孤苦餘  
生出而所怙者誰乎入而所恃者誰乎左右提攜若手  
足之相衛者又誰乎嗚呼此某自罹荼毒以來所以日  
夜仰天椎心而泣血不知日月之不居寒燠之有變遷